

## 上帝 ê 管教

經文：撒母耳下 11:1-15

7-30-06

近來台灣國民黨 kap 一寡所謂「親綠學者」連續要求陳水扁總統下台，一個民主國家 ê 掌權者做毋著自然有伊 ê 制裁方法。總是佇專制極權下面 ê 統治者 beh 向是誰負責 neh? 大衛 kap 拔示芭 ê 故事，佇今 ê 日來看真平凡，只要開任何媒體，每工攏有 bô 相像版本 ê 消息。問題是當大衛知影拔示巴有身了後，大衛想著召回拔示巴佇前線 ê 丈夫烏利亞，互伊作嬰阿 ê 老父。總是烏利亞愛國，beh kap 伊 ê 士兵作夥，v. 11 記載烏利亞講：「約櫃 kap 以色列 kap 猶大攏站佇草寮仔；我 ê 主約押 kap 我 ê 主 ê 奴僕攏紮營佇田野；我 kiám thang tò 去我 ê 家 lim 食，kap 我 ê 某相 kap 暍嗎？我指我 ê 生命來咒 chōa, 我決斷無 beh 行一 ê 事。」大衛一計無效，又想一計，將烏利亞派到尙危險 ê 前線，結果烏利亞 ê 忠心互大衛謀殺。大衛犯著十誡中 ê 三誡：貪戀人 ê 某、犯姦淫 kap 殺人。Chit-ê 故事顯明大衛用權術不擇手段，完全是王 beh 按怎就按怎，目中無上帝。M-koh 以色列是上帝 ê 國度，統治者只是上帝 ê 代表 nā-tiān。上帝無歡喜大衛 ê 作為，派拿單去質問大衛。拿單講一個貪心、不公義 ê 故事：有一個富人牛羊成群，為著招待一個人客，毋用家己 ê 牛羊，卻去掠散赤人厝內唯一隻羊羔，準備互人客喫。拿單問大衛 beh 按怎裁決，大衛生氣講：『行 chit 項事 ê 人該死。』無打算拿單指著大衛講：『你就是 hit 人。』現在台灣 ê 情形就是 an-ne。馬英九貪黨產幾千億，家己 m̄ 反省，卻來指責趙建民 iáu boe 判罪 ê 內線交易，又放 tiau 總統 na m̄ 下台會死 ka 真歹看。

咱常常認為一帆風順，就是上帝 ê 同在 kap 賜福，卻毋知有時伊 ê 槌，伊 ê 拐更加 ē-tàng 表達上帝 ê 疼，無論是對個人、群體或是國家攏是 án-ne。聖經記載大衛暍中晝暍醒，kau2 皇宮 ê 平頂散步，NRSV 譯成 roof，咱真少人會閒閒行去厝頂散步。大衛王 ê 前半世人互上帝歡喜，伊掌權了後，生活安逸，前線 ê 軍隊 iáu teh 相 tai5，伊佇王宮內底作樂，暍到日頭平西 chiah 起來。當伊看見拔示巴 te 洗身軀 ê 時，試探來 lah，伊 tui 放鬆到放肆；tui 放肆到放蕩；tui 放蕩到放毒。只是一念之差，一 ê 罪接續另外一 ê 罪。改革宗佇 1618-1619 年召開大會，大會完成多特信經(Canons of Dort)，制定加爾文派預定論。其中第一條是人全然 ê 敗壞。人 ê 敗壞 kap 上帝 ê 疼是對立 ê，加爾文講咱無應該認為罪是善 ê 虧欠，罪是人整體 ê 敗壞，慾望本身是罪，伊 kā 人每一部分 ê 本性攏敗壞 lah，總是 chit 種敗壞 ê 根源，是出佇驕傲。前二日有一位台神同工來找我，te 回想過去所羨慕 ê 牧長到晚年有寡真悽慘，雖罔有寡 iáu 是熱心疼主，總是大部分晚節不保。只要比較 In kap 大衛 ê 遭遇，thang 看出佇豐足 ê 環境，人真容易失去起初 ê 疼心，漸漸貪戀世事，變 kah 自高自滿，疼上帝 ê 心漸漸冷淡，犯罪又毋知 thang 回頭，總是尙驚 ê 毋是上帝 ê 管教，是上帝毋管教，因為伊 ê 責備 kap 管教說明伊 iáu 住佇咱 ê 生命內，猶原無棄 sak。

大衛 ê 可貴，是伊無一般人 ê 驕傲，當伊犯罪，拿單當面 ka 伊譴責，大衛不但無老羞成怒，反而自知罪孽深重，入耶和華 ê 殿懺悔敬拜，因為伊知影上帝 iáu 未棄 sak 伊（詩 51:11）。大衛佇詩篇 23 章講：伊 ê 槌，伊 ê 拐 ē-tàng 安慰人，伊感受著 ê 刑罰是上帝疼 ê

記號，só-i 發出嘔啞。大衛寫詩篇 51 篇拉丁文 Miserere 原來是有憐憫(have mercy) ê 意思，表達伊 ê 真心悔改，大衛沈重喊 hoah 講：「我所犯 tiòh-ê，就是得罪你 nā-tiāⁿ。」(51:4) 除了憂傷 ê 靈；痛悔 ê 心，伊無別項 thang 獻 hō 上帝，這 mà 是頂禮拜咱所講 ê 合上帝心意 ê 敬拜，是上帝真正愛 ê 祭物，大衛誠心 ê 認罪已經互伊得著醫治。伊痛悔，互這篇詩篇成作後來認罪 ê 指南，tùi 伊 ê 懺悔詩，以後 e5 人對赦免有新 ê ng 望。歷代作曲家常常用此 chit ê 詩篇寫作宗教音樂，尤其是文藝復興時期有名 ê 無伴奏曲 (acapella) 通常 tī 聖灰日 kap 受難日使用。Nà 是大衛犯罪了後，上帝無任何表示，伊 ê 後果會按怎？順利 ê 犯罪 kan-ta 會引往一個後果…犯 koh-khah 大 ê 罪，無其他 ê 可能，咱應該對 chit-ê 角度來瞭解上帝 ê 管教。Chit ê 王，最後成做上帝 ê 朋友，以色列人甚至稱呼耶和華作大衛 ê 上帝，為啥物？因為當伊惡行敗露了後，馬上認罪接受上帝 ê 管教，又承認上帝 chiah 是真正 ê 掌權者，tùi án-ne 上帝接納大衛 ê 祈禱，應允堅立伊 ê 王位直到永遠。這 mà 是伊留 hō 世人尚寶貴 ê 禮物，無任何一個罪人會因為犯罪來脫離上帝 ê 疼 kap 赦免。

上帝有時會藉悔改 ê 人成就大事。大衛 kap 彼得是兩個基督徒尚愛 ê 名，其實 chit 兩 ê 人佇 in 人生中間攏 bat 失敗過，總是後來攏是靠上帝 ê 恩典悔改，koh 達 kàu 人生 ê 高峰。大衛是生佇舊約時代，按律法伊要互石頭拍死。公義 ê 上帝雖罔免除伊 ê 死罪，總是刑罰 iáu 是嚴轄 ê。12:11 耶和華講：「我 beh 對你 ê 家興起災厄攻擊你；我 beh 佇你 ê 目矙前，用你 hiah-ê 某互你 ê 厝邊，伊 beh 佇青天白日 kap 你 hiah-ê 某同房。因為你佇暗中行伊，總是我 beh 佇青天白日，佇以色列眾人 ê 面前，行 chit-ê 事。」後來 m̄-na 大衛 kap 拔示巴所生 ê 子死去，大衛攏總死四 ê 子。伊因為做 m̄ 著一件事，全家陷入一片混亂，伊 m̄-na 失去佇家族中 ê 道德權威地位，甚至互家己 ê kiáⁿ 兒押沙龍所逼，逃難離開耶路撒冷。Chit 種紛爭直到大衛死了後 iáu 未停止，看著大衛 ê 遭遇咱應該要警醒。

聖經通常將管教 kap 疼相接連，箴言 13:24 講：「m̄ 甘用箠 ê 是怨恨伊 ê kiáⁿ；若是疼-伊 ê，就照時責督 i。」；又詩篇 94:12：「耶和華 ah, 你所教督 koh 用你 ê 律法所教示 ê，Hit-ê 人有福氣。」這並毋是鼓勵虐待 gín-á，卻是為著 gín-á ê 將來。上帝藉著 bō 同 ê 遭遇來造就咱，成全咱，互咱成做 thang 用 ê 器具，所以「管教」是疼 ê 安排，是為著尚大 ê 好處。Tùi 個人到國家 ê 角度攏是按呢，就近來台灣 ê 亂象，一時間咱 iáu 看 bē 出意義 ê 所在，mà 不需要胡亂找理由，總是有寡信念是 bē 使放棄 ê。首先，咱 bē 使放棄上帝佇 chiah-ê 事頂面有伊 ê 安排。Koh 來，咱 bē 使放棄上帝猶原掌權作主，惡勢力雖然猖狂，最後會邪不勝正。第三、咱 bē 使放棄相信上帝帶著慈愛 ê 管教；時機 na kau，伊 ê 管教效果就會顯明出來。雖罔咱毋知伊 beh 用啥物款方法，總是歷史上 tó 一個惡勢力 ē-tàng 久久長長 neh? 相信伊 tùi 過去 ê 極權帶領台灣行到今 á 日 ê 民主，一定有伊 ê 救贖計畫，ng 望陳總統 ē-tàng 深刻 ê 反省，詩篇 51:17 講：「憂傷痛悔 ê 心，上帝必不輕看。」咱也著根據聖經持守積極 ê 態度，為台灣 ê 安定 kap 前途代禱，就是佇烏暗中也著確信光明一定 oe kau。